

新刊增廣百家詳補註唐柳先生文卷第一

唐雅

唐詩

貞符

獻平淮夷雅表一首

柳宗元集

第二册

臣元言臣有罪竊伏違書牋奏十有四年

淮夷詩曰宣王能興衰宣王能興衰平
元和十二年十月癸酉蔡故曰淮夷蓋公擬江夷蓋公擬江也
與韓文公長云韓文公
皆辭嚴義偉於盛漢之表談藪云論柳文者皆以謂
封建論退之所無

貞元九年自禮
外郎郎官掌尚書牋奏公永貞元年自禮
鄧州刺史

柳宗元集

第二冊

中華書局

柳宗元集卷十三

誌

先太夫人河東縣太君歸祔誌

〔詳注〕公謫永州司馬，故太夫人卒于永。明年，歸祔于京兆先侍御史府君之墓。公尚留永州，不得奉喪事以歸，作此誌。

先夫人姓盧氏，諱某，世家涿郡，〔孫曰〕涿郡范陽人。涿，音卓。壽止六十有八，元和元年，歲次丙戌，五月十五日，棄代于永州零陵佛寺。明年某月日，安祔于京兆萬年棲鳳原先侍御史府君之墓。其孤有罪，銜哀待刑，不得歸奉喪事以盡其志，姪洎太夫人兄之子弘禮承事焉。嗚呼天乎！太夫人有子不令而陷于大僂，音戮，又力救切。徙播瘠土，醫巫藥膳之不具，以速天禍，非天降之酷，將不幸而有惡子以及是也。又今無適主以葬，〔一〕適，音的。天地有窮，此冤無窮。既舉葬訖，〔二〕童曰，鉏，索也。鉏，直忍切，與「綏」同。周禮封人：置其綏。猶以不肖之辭，「肖」，

一作「孝」。擬述先德，且誌其酷焉。

嘗逮事伯舅，聞其稱太夫人之行以教曰：「汝宜知之，七歲通毛詩及劉氏列女傳，斟酌而行，不墜其旨。汝宗大家也，既事舅姑，周睦姻族，柳氏之孝仁益聞。歲惡少食，不自足而飽孤幼，是良難也。」又嘗侍先君，有聞如舅氏之謂，且曰：「吾所讀舊史及諸子書，夫人聞而盡知之無遺者。」某始四歲，〔韓曰〕大曆十二年，公四歲。居京城西田廬中，先君在吳，家無書，太夫人教古賦十四首，皆諷傳之。〔三〕皆，一作「比」。以詩禮圖史及翦製縷結授諸女，及長，皆爲名婦。

先君之仕也，伯母叔母姑姊妹子姪皆遠在數千里之外，〔四〕必奉迎以來。太夫人之承之也：尊己者，敬之如臣事君；下己者，慈之如母畜子；敵己者，友之如兄弟。無不得志者也。諸姑之有歸，必廢寢食，禮既備，嘗有勞疾。先君將改葬王父母，太夫人泣以蒞事。事既具，而大故及焉，〔孫曰〕貞元九年五月十七日，鎮卒。不得成禮。

既得命於朝，祇奉教曰：「汝忘大事乎？吾冢婦也，今也宜老，而唯是則不敢暇，抑將任焉。若有日，〔五〕吾其行也。」及命爲邵州，〔孫曰〕永貞元年九月，公貶邵州刺史。又喜曰：「吾願得矣。」竟不至官而及於罪。〔韓曰〕是歲十一月，再貶永州司馬。是歲之初，天子加恩羣臣，〔孫曰〕貞元二十一年正月，順宗卽位。二月大赦，加恩羣臣。以宗元任御史尚書郎，封太夫人河東縣太君。八月，會

册太上皇后于興慶宮，禮無違者。^{〔六〕}孫曰永貞元年八月辛丑，命婦會策太上皇后于興慶宮。既至永州，又奉教曰：「汝唯不恭憲度，既獲戾矣，今將大儆于後，以蓋前惡，敬懼而已。苟能是，吾何恨哉！明者不悼往事，吾未嘗有戚戚也。」而卒以無孝道，不能有報焉。

喪主子婦七歲，^{〔孫曰〕}貞元十五年，公之妻楊卒。而不果娶。^{〔七〕}竄窮微，^{〔童曰〕}微，境也。微，吉弔切。人多疾殃，炎暑煊蒸，^{〔童曰〕}煊，火熱也。煊，呼木、黑各、虛驕三切。其下卑濕，非所以養也。診視無所問，藥石無所求，禱祠無所實，^{〔八〕}蒼黃叫呼，遂遭大罰。天乎神乎，其忍是乎！而獨生者誰也？爲禍爲逆，又頑很而不得死，逾月逾時，以至于今。靈車遠去而身獨止，玄堂暫開而目不見。孤囚窮繫，陟立切。魄逝心壞。蒼天蒼天，有如是耶？有如是耶？而猶言猶食者，何如人耶？已矣已矣！窮天下之聲，無以舒其哀矣。盡天下之辭，無以傳其酷矣。刻之堅石，措之幽陰，終天而止矣。

校勘記

〔一〕又今無適主以葬「又今」，英華作「今又」。

〔二〕既舉葬紉句下注「紉，索也。與『綯』同」。按：「紉」與「引」同。「引」指柩車索。「綯」字作牛鼻繩解，與「紉」不同。

〔三〕皆諷傳之「諷傳」，英華作「諷誦」。

〔四〕皆遠在數千里之外「皆」，音辯，五百家本及英華、全唐文作「雖」。

〔五〕若有日「若」，音辯，詰訓，五百家本及英華、全唐文均作「苟」。

〔六〕會冊太上皇后于興慶宮禮無違者句下注「永貞元年八月辛丑，命婦會策太上皇后于興慶宮」。

「辛丑」原作「辛未」。按：此年八月無「辛未」。又據新、舊唐書順宗紀，永貞元年八月辛

丑，詔立良娣王氏爲太上皇后。今據改。

〔七〕喪主子婦七歲而不果娶何焯義門讀書記：「婦」字上有「宗」字。」

〔八〕禱祠無所實「實」，蔣之翹本作「資」。

伯祖妣趙郡李夫人墓誌銘

夫人姓李氏，辯族姓者曰，趙郡贊皇之東祖。贊皇，趙州縣名。〔孫曰〕六國時，武安君李牧事趙，遂

爲趙人。晉司農丞楷徙居常山，有五子：輯、晃、芬、勁、叡，叡子勗，兄弟居巷東，勁子盛，兄弟居巷西，故叡爲東祖，芬與

弟勗共稱西祖，輯與弟晃共稱南祖。祖某，爲某官。父冲，爲單父尉。夫人生於良族，巖然殊異。及

笄，〔童曰〕女十五而笄。說文云：笄，簪也。笄，音稽。德充於容，行踐於言，高朗而不傷其柔，嚴恪而不

害其和。特善女工翦製之事，又能爲雅琴秦聲操縵之具。〔一〕〔孫曰〕爲雅琴，擊琴也。楊惲曰：「家本

秦也，能爲秦聲。叩擊而歌之也。

〔禮記〕：不學操縵，不能安絃。操縵，雜弄也。操，七刀切。縵，末旦切。

婦道既備，

宜爲君子之配偶焉。

我伯祖臨叩令府君諱某，

〔韓曰〕此誌不載臨叩君諱，新史年表亦止載曰某爲臨叩

令，它無所考，蓋察躬兄也。

受夫人於李氏之廟而歸于正室。

臨叩府君之先曰我曾王父清池府君

諱某。清池之先曰徐州府君諱某。〔三〕〔童曰〕諱子夏。

又其先曰常侍府君諱楷。常侍之兄子

曰中書令諱爽。〔三〕自中書以上，爲宰相四世。

〔孫曰〕爽父則，則父旦，旦父慶，凡四世爲相。

噫！我伯祖以宗胄碩大而濟其德厚，〔濟〕字，一作「齊」，又一作「饒」。夫人以族屬清顯而修其

禮範，合二姓以承先祖，爲士者榮之。故佐奉養，承祭祀，婦德用光，家道甚宜。無何，伯祖

終于臨叩而窆焉。夫人從子而返于淮潁。

潁，水涯之名。〔孫曰〕夫人家揚州，淮潁謂此。潁，音虎。鳴

呼！我先府君每得仕，未嘗不奉迎供養，必誠必親。男既立，必使之有祿仕，女必使之有

家。將嫁己子，必先擇良士可以配諸姑者，定，然後議焉。仲父殿中侍御史府君由是志也。

夫人生男一人，諱某，不幸終於宣州旌德尉。〔韓曰〕此誌不載其名，而曰終旌德尉。史亦不載其名，

而曰終旌德令。恐史誤作尉以爲令也。女三人，皆得良婿。隴西李伯和爲揚子丞，疾痺廢癰而沒。〔四〕

太原王紓，〔孫曰〕紓，工部員外郎端之子。其弟曰紹，唐史有傳。紓，音舒。今爲右補闕。潁川陳萇，〔五〕

〔孫曰〕萇，京之兄。公有京行狀。萇，音長。爲校書郎、渭南尉，知名。貞元十六年，王氏姑定省扶持，

自揚州至于京師，道路遇疾，遂館于陳氏。以諸壻之良，諸女之養，無不得意焉。享年八十一，是歲六月二十九日，終于平康里。自小斂至于大斂，比及葬，則二壻實參主之。有孫二人，長曰曹郎，奉之以縗而正于位。八月二十四日，葬于萬年縣之少陵原，實棲鳳原，介于我先府君仲父二兆之間，神心之所安也。

嗚呼！嗣子早夭，臨叩萬里，以歲之不易，〔孫曰〕左氏昭四年之文。不易，有難也。未克合祔，哀孰甚焉。諸姑命宗元以爲斯志。〔六〕以從人之道，內夫家，外父母家，且又葬于我，志于我，故敘柳氏爲備。銘曰：

藹其芳，壽且康，大梁鶉火沉幽光。〔韓曰〕大梁、鶉火，二星名。是年，歲星在大梁，六月，日月會於鶉火。蓋以紀卒之年月也。夙淪夫子嗣又喪，平聲。輜帷不復岷之陽。〔童曰〕輜，喪車飾。岷之陽，指臨叩令宅所也。輜，此見切。或作「舊」。兆靈趾，棲鳳里，艮之山，兌之水，靈之車，當返此。子孫百代承靈祉，誰之言者青烏子。〔孫曰〕風俗通曰：漢有青烏子，善數術。唐藝文志，葬書有青烏子三卷。〔韓曰〕相家書曰：青烏子稱山三重相連，名連華山。葬之，當出二千石。

校勘記

〔一〕又能爲雅琴秦聲操縵之具句下注「操縵，雜弄也」。〔雜弄〕原誤作「雜聲」，據禮記學記孔穎

達疏改。

〔二〕我曾王父清池府君諱某清池之先日徐州府君諱某「徐州府君」前原脫「我曾王父清池府君諱某清池之先日」十五字，據取校諸本補。

〔三〕常侍之兄子曰中書令諱爽「兄」下原脫「子」字。按：楷弟兄五人：變、則、綽、楷、亨，爽乃次兄則之子，見新唐書卷七三上宰相世系表及舊唐書卷七七柳爽傳。今據補。

〔四〕疾痺廢癰而沒「疾」，英華作「病」。

〔五〕潁川陳萇句下注「萇，京之兄」。「兄」原誤作「弟」，據世綵堂本及本書卷八陳給事行狀改。

〔六〕諸姑命宗元以爲斯志「命」原作「合」，并脫「宗元」二字。何焯義門讀書記：「『合』作『令』，『令』字下補『宗元』二字。」今據英華及全唐文改補。

叔妣吳郡陸氏夫人誌文

〔韓曰〕陸氏，公叔父殿中君之配。公前作殿中君墓版文時，夫人尚無恙，至是而夫人卒，合祔焉，爲此誌文。

夫人諱則，字內儀，姓陸氏，家于吳郡，蓋江左上族。以宗子在他國，家牒逸墜，故曾王父、王父之諱官，不克究知而闕其文。父覃，皇河南陸渾令。夫人生而柔，笄而禮。會伯舅

爲河南尹，撰擇僚案，撰，息究切。謂我文學掾仲父，〔韓曰〕時殿中君爲河南文學。士林殊英，儒流推高，故夫人歸于我。

夫人之志也，〔一〕溫順以承上，冲厚以字下，不敢踰於冢婦，不敢侮於臣妾。〔童曰〕孝經：治家者不敢失於臣妾，而況於妻子乎？是宜允膺福壽，〔二〕集成母儀。稟命不淑，享年三十有五，貞元十二年十一月己亥，終于長安太平里第。嗚呼！夫人生男一人，曰曹婆，幼孺在抱，委縗就位。縗，音崔。女一人，曰喜子，匍匐繼縗，繼，舉兩切。縗，音保。寄婦人之手。哀哉！蓋哀門薄祐，神道不相，顧仲父違背於歲首，〔韓曰〕正月九日，殿中君卒。而夫人捐棄於是月。遺孤眇藐，未克承紹，凡我族屬，其痛巨乎！遂以其年十二月十三日庚午，合祔于少陵原之墓。恭惟仲父之諱字爵齒，〔三〕備于版文，今不書，懼再告也。

校勘記

〔一〕夫人之志也 何焯批校王荊石本：『志』乃『至』字之訛。疑是。

〔二〕是宜允膺福壽 「允」原作「永」，據取校諸本改。

〔三〕恭惟仲父之諱字爵齒 「爵齒」上原有「夫人之」三字。陳景雲柳集點勘云：『夫人之』三字衍。按：舊社會婦女無官爵，而其年齒則已明敍於前，且宗元叔父之「諱字爵齒」已備于本書卷

一二故叔父殿中侍御史府君墓版文，與此文意正合。陳說是。今據刪。

亡姑渭南縣尉陳君夫人權厝誌

唐貞元十七年九月六日甲子，〔孫曰〕實乙丑。前渭南縣尉穎川陳君之夫人河東柳氏，〔二〕，
〔韓曰〕穎川陳君名長，京之兄也。夫人，前所誌伯祖妣李夫人之女也。終于平康里。將終，告于陳君曰：「吾生
四十有四年，爲陳氏介婦九年，謹飭不怠，以至於此，命也。既成婦矣，宜附于皇姑，從兆于
三原，然而不幸中道而有痼疾，既不及養于舅姑，又不得佐于蒸嘗，生君之子，不期月而殞，
嘗謂君宜有貴位，而不克見，執親之喪，不得終紀，皆天譴之大者也。且願殺禮，〔童曰〕周禮：
國新殺禮。殺，所介切。以成吾私，邇先夫人之墓而窆我焉。將俟君之不諱，而歸復於正，其可
也。」陳君乃卜十二月十八日，權厝于城南，原曰棲鳳，如夫人之志。且以時日甲子，授于宗
元曰：「子之姑，孝於家，移于我之長，睦于族，施于我之黨。是用賓而禮之，如益者之友，〔童
曰〕語曰：益者三友。今則去我，已矣，吾無以報焉。他日嘗謂子慤而文，願以爲誌，庶幸而有
知，將安子之爲也，〔長無恨矣。〕嗚呼！貴不必賢，壽不必仁，天之不可恃也久矣。遂哭而受
命，書夫人之世，以記于茲石。

夫人六代祖諱慶，五代祖諱旦，位皆至宰相。高祖諱楷，爲濟州刺史。曾祖諱某，〔童〕曰諱子夏。爲徐州長史。祖諱某，〔童〕曰諱從裕。爲清池令。考諱某，爲臨邛令。妣李氏，趙郡贊皇人。其他則俟改葬而後備。

校勘記

「〔一〕前渭南縣尉潁川陳君之夫人河東柳氏句下注「夫人，前所誌伯祖妣李夫人之女也」。此句原誤作「夫人柳氏，公叔父殿中君之女」（五百家、世綵堂、蔣之翹本注同），據詒訓本韓醇注改。按：誌文明言夫人之「考諱某，爲臨邛令，妣李氏，趙郡贊皇人」，又夫人之夫陳萇對宗元言亦稱「子之姑」，如爲宗元叔父之女，則與宗元爲姊弟而非姑侄關係。詒訓本韓醇注是。

亡姊崔氏夫人墓誌蓋石文

我伯姊之葬，良人博陵崔氏爲之誌。〔孫曰〕崔簡，字子敬。凡歸于夫家，爲婦爲妻爲母之道，我之知不若崔之悉也。然而自笄而上以至于幼孩，崔固不若我之知也，又烏可以已。今之制，凡誌于墓者，琢密石，加蓋于其上，用敢附碑陰之義，假茲石而書焉。

嗚呼！夫人天命之性，〔童曰〕禮：天命之謂性。固有以異於人。孩而聲和，幼而氣柔。以吾族之大，尊長之多，長，丁兩切。夫人自能言，而未嘗誤舉其諱。與其類戲于家，游弄之具，未嘗有爭。先公自鄂如京師，〔孫曰〕鎮爲鄂岳都團練判官。一本有「歸」字。其時事會世難，告教罕至，〔一〕「告」一作「書」。夫人憂勞踰月，默泣不食，又懼貽太夫人之憂慮，給以疾告，給，欺也。給，音怠，上聲。書至而愈，人乃知之。善隸書，爲雅琴，以自娛樂，隱而不耀。工足以致美於服而不爲異，言足以發揚於禮而不爲辨。孝之至，敬之備，仁之大，又以配君子。然而不克會于貴壽，以至于斯，孰謂之天有知者耶？一無「之」字。

太夫人生二女，幼曰裴氏婦，〔孫曰〕幼適裴，字封叔。如夫人之懿。在二族咸以令德聞，而皆早世。其弟昏愚而獨存，孰謂天可問耶？一本「問」字下有「者」字。嗚呼，痛其甚歟！遂濡血而書，一作「以書」。以志終天之哀，與茲石永久。

校勘記

〔一〕告教罕至 「告教」，音辯、五百家本作「教告」。何焯義門讀書記：「『告教』作『教告』，父之家書稱『教告』。」按：「教告」一詞，見書多方，是上對下以文辭訊告之意。而「告教」見書立政，是進言戒君之意。此處作「教告」是。

亡姊前京兆府參軍裴君夫人墓誌

柳氏至于唐，其著者中書令諱爽。中書之弟曰徐州府君諱某，〔一〕〔童曰〕諱子夏。實有孝德，世其家業。清池府君諱某，〔童曰〕諱從裕。繼之以茂實。德清府君諱某，〔童曰〕諱察躬。承之以善政。以至于侍御史府君諱某，〔童曰〕諱鎮。用貞信勁正，達于邦家。克生賢女，以配于裴氏。裴氏至于唐，其著者禮部尚書諱行儉。〔孫曰〕行儉字守約，絳州聞喜人。高宗時爲禮部尚書。禮部之子曰侍中諱光庭，〔孫曰〕光庭字連城，開元時爲宰相。嗣用忠肅，書于國史。祠部府君諱稹，〔孫曰〕光庭子稹，開元末爲祠部員外郎。業之以貞直，以至于金吾府君諱儼，音警。用純懿端亮，聞於天下。實生良子，以配夫人。〔孫曰〕儼四子：堅、壘、填、填。夫人，壘之配也。

嗚呼！夫人與仁孝偕生，以禮順偕長。始於家，純如也；終於夫族，穆如也。其爲子道也，孝以和，恭以惠，取與承順，必稱所欲。先君與太夫人恩遇尤厚，故夫人侍側，無威怒之教焉。天禍弊族，夙遭大故，我諸孤奉太夫人之養，不敢圖死，至于復常。夫人三歲無湯沐，無鹽醕，音洛。頓踴叫號，哀徹天地。外除髮不勝筭，體不勝帶。太夫人泣而命之，固猶不食，朝夕諭誨，僅而濟焉。其爲妻道也，貞順之宜，恒服於身體；疑忌之慮，不萌於心術；

忿懣之色，「童曰」忿懣，恨也。〔禮記〕：有所忿懣，則不得其正。懣，音致。不兆於容貌，同焉而合於禮，婉焉而得其正。其爲婦道也，惟聽順謹敬睦姻任恤之行甚備，常以不幸，不及姑舅之養，「三」用爲大恨。是故相春秋之事，际滌濯，羞簠簋，勞以待旦。每怵惕之感至焉，則又移其孝於裴氏之門，一本作「移其孝于兄公女公」。而以睦于冢婦介婦，必敬必親，下以不失其赤子之心，姻族歸厚，率由是也。嗚呼！我之大譴歟？裴氏之大不幸歟？以夫人之德行，宜貴壽，宜康寧，然而年始三十，不克至于壽。良人官爲參軍事，「孫曰」〔壻時爲京兆府參軍。〕不及偕其貴。骨髓之疾，實鍾于身，以貞元十六年三月十三日甲子，終於光德里第。痛矣夫！

始夫人之疾也，夫人之族視之如己，一有「宗」字。其家老、長妾、臧獲之微，皆以其私奔謁於道路，禱鬼神、問卜筮者相及也。既病，太夫人在側，尚慮積憂傷于尊懷，猶持形立氣，給以少間。故二稚未亂，〔壻子銑。〕「童曰」亂，毀齒也。男八歲、女十歲而亂。亂，初覲切。良人在遠，不及有緒言遺念以傳於後。則我呼天之痛，宜有加焉。嗚呼！天胡厚是懿德而闕其報施，獨何咎歟？「三」余不知天之忍也。「四」既逾月，良人至自洛師，望門而哭曰：「無以立吾家成吾身矣。」凡生三子，幼曰崔七，先夫人八月而殞，「五」魂氣無不之也。次曰崔六，後夫人五旬而夭，因附焉。今其存者曰崔五，幸無恙，託于乳媪，〔烏皓切。〕以虞水火。哀哉！其年八月十八日甲子，安厝于長安縣之神禾原，從于先塋，附于皇姑，宜也。

母弟號哭而爲之志，毒痛憑塞，略不能具。敢告無愧辭，無溢美，庶用正直，克安神心。嗚呼！至哀無文，〔六〕至敬不飾，故無其辭。

校勘記

〔一〕中書之弟曰徐州府君諱某「之弟」下原衍「之子」二字。陳景雲柳集點勘：「徐州乃中書從弟，非弟子也。『弟』下衍二字。」按：新唐書卷七三上宰相世系表，子夏爲奭叔父楷之子，乃奭之從弟。陳說是。今據刪「之子」二字。

〔二〕不及姑舅之養「姑舅」，詁訓本及英華作「舅姑」。

〔三〕獨何咎歟「咎」，英華作「心」。

〔四〕余不知天之忍也英華「余」下有「一」字。何焯義門讀書記亦云：「余」字下增「一」字。」

〔五〕先夫人八月而殞「殞」，音辯、五百家、游居敬本及全唐文作「殯」。何焯義門讀書記亦云：

「『殞』作『殯』。」

〔六〕至哀無文「至哀」，英華作「至親」。

亡妻弘農楊氏誌

亡妻弘農楊氏，諱某。高祖皇司勳郎中諱某，〔孫曰〕司勳諱元政。司勳生殿中侍御史諱

某。〔孫曰〕侍御史諱志玄。殿中生醴泉縣尉諱某。〔孫曰〕諱成名。醴泉生今禮部郎中諱。

〔孫曰〕咸名三子，憑字虛受，凝字懋功，凌字恭履。〔韓曰〕「凝當作『憑』」。憑嘗爲禮部郎中，集又有祭楊詹事文可見。今作「凝」，

非是。代濟仁孝，號爲德門。郎中娶于隴西李氏，生夫人。夫人生三年而皇妣卽世，外王父

兼，居方伯連帥之任，歷刺南部。〔孫曰〕建中四年，以兼爲鄂岳觀察使。貞元元年，遷江西觀察使。夫人自

幼及笄，依于外族，所以撫愛視遇者，殆過厚焉。夫人小心敬順，居寵益畏，終始無驕盈之

色，親黨難之。五歲，〔孫曰〕建中二年，年五歲。屬先妣之忌，飯僧於仁祠，就問其故，媾音保。傳

以告，〔一〕遂號泣不食。後每及是日，必遑遑涕慕，抱終身之戚焉。及許嫁于我，柔日既

卜，〔韓曰〕禮記：外事以剛日，內事以柔日。柔日，乙、丁、己、辛、癸是也。乃歸于柳氏。恭惟先府君重崇友道，

於郎中最深。髻音迢。稚好言，始於善謔，〔童曰〕詩：善戲謔兮。雖間在他國，終無異辭。凡十有

三歲，而二姓克合，奉初言也。

夫人既歸，事太夫人，〔韓曰〕公之母，河東縣太夫人盧氏。備敬養之道，〔三〕敦睦夫黨，致肅雍

之美。主中饋，〔三〕佐烝嘗，怵惕之義，表于宗門。太夫人嘗曰：「自吾得新婦，增一孝女。」

況又通家，愛之如己子，崔氏、裴氏姊視之如兄弟。故二族之好，異于他門。然以素被足

疾，不能良行。〔四〕〔孫曰〕昭七年左氏：孟鑿之足，不良能行。注云：跛也。未三歲，孕而不育，〔孫曰〕易：漸之